

TSWVYIM LOS NTAWM VAJ NTSUJPLIG

Spiritual Gifts

Zajqhia 5 – Lukas 4:14-21 (Saib Yaxayas 61:1-3)

Vaj Ntsujplig Tsa Yus Ua Vajtswv Haujlwm

Nyob hauv Tes Haujlwm 1:8, uantej Tswv Yexus yuav rov mus saum ceebtsheej, Nws hais rau cov timthawj hais tias, "Tabsis nej yuav tau txais hwjchim (power) thaum Vaj Ntsujplig tus Dawbhuv los rau nej, thiab nej yuav ua Kuv cov povthawj hauv nroog Yeluxalees, thoob plaws xeev Yudas thiab xeev Xamalias, thiab mus kom thoob ntiajteb."

Cov ntseeg Tswv Yexus coob leej ntau tus kuj hais tias lawv tau txais Vaj Ntsujplig tus Dawbhuv lawm, tabsis lawv ho nyob dawb, tsis ua dabtsi li. Tsis muaj peevxwm ua povthawj rau Tswv Yexus thiab twb tsis kam tuav ib teg haujlwm hauv pawg ntseeg hlo li.

Nyeem kom tag Lukas 4:14-21, thiab mus nyeem Yaxayas 61:1-3 tag tso koj mam rov los teb cov lus nug nram qab no uas hais txog tej haujlwm uas Tswv Yexus ua thaum Vaj Ntsujplig los rau Nws lawm.

1. Thaum Tswv Yexus hnuvnyoog muaj li 30 xyoo (Lukas 3:23), Nws tau pib ua Vajtswv haujlwm. Tabsis uantej yuav pib ua Vaajtswv haujlwm Nws tau mus rau nram xeev Yudas thiab mus ua kevcai raus dej ntawm Yauhas tus muab neeg ua kevcai raus dej. Tomqab ntawd Nws tau mus rau tom roob mojsab qhua thiab mus yoo mov tau 40 hnuv. Dhau ntawd lawm, Nws tau mus qhuabqhia rau qhovtwg? (Nyeem nqe 14-16).

2. Nqe 17. Thaum Tswv Yexus rov los txog hauv Nws lub zos Naxales, hnuv

so, Nws tau mus nrog sawvdaws pehawm Vajtswv hauv lub tsev sablaj. Lawv muab ib phau Vajluskub los rau Nws nyeem. Phau Vajluskub ntawd yog phau twg thiab Nws nyeem ntawm tshoojtwg thiab nqe twg?

3. Nqe 20 thiab 21. Tomqab Tswv Yexus nyeem tag, Nws ua li cas thiab hais li cas rau sawvdaws?

4. Nqe 18-19. Teev kom tagrho cov haujlwm uas Tswv Yexus hais tias Vaj Ntsujplig tau tsa Nws ua rau ntawm no:

(1) _____
(2) _____
(3) _____
(4) _____
(5) _____

5. Cov haujlwm no yog ua rau sab nqaij-tawv lossis sab ntsujplig? Yog uacas koj ho hais li ntawd?

6. 2 Kaulithaus 4:4, leejtwg ua rau noobneej lub qhovmuag sab ntsujplig dig lawm?

7. Uantej tsis tau los txais yuav kev cawmdim ntawm tus Tswv Yexus, koj thiab koj tsev neeg raug dab Ntxwjnyoog ua rau nej sab ntsujplig digmuag (blinded) licas? Nej raug tsimtxom (oppressed) licas? Nej raug kaw hauv Ntxwjnyoog lub qhovtaub (prison) licas?

8. Nyeem Efexaus 6:12-20 uantej. Yog uacas peb sawvdaws thiaj yuavtsum tau txais hwjchim (power) ntawm Vaj Ntsujplig tus Dawbhuv uantej peb ua tau tej haujlwm uas Tswv Yexua ua ntawd?

Tsis txhob ntshaw lub hwjchim ntawm Vaj Ntsujplig thiab siv qhov ntawd los ua chaw khavtxiv xwb, tabsis yuav tau thov Vajtswv hais tias, *“Vajtswv koj tabtom yuav ua dabtsi rau peb pawg ntseeg lossis rau lub ntiajteb no? Puas muaj tej yam uas koj txib tau kuv nrog koj ua? Yog muaj no, thov Vaj Ntsujplig pub tswvyim thiab hwjchim rau kuv kom kuv ua tau tes haujlwm ntawd rau koj.”*

Txawm Vajtswv tsis txib yus ua ib yam uas sawvdaws yuav suav hais tias tseemceeb los txhua yam haujlwm uas ua rau Vajtswv yeej puavleej tseemceeb rau Nws huvsu. Ua povthawj rau Tswv Yexus yog yam peb txhua tus ua tau. Txhob tso tes haujlwm ntawd tseg.